

# Around The World In 1 Day

## beri pendedahan global kepada mahasiswa UMP

Selaras dengan Polisi Pengantarabangsaan yang telah dibentuk dan dilancarkan oleh Pejabat Antarabangsa UMP pada Ogos 2010, satu program mobiliti pelajar, "Around The World In 1 Day" telah berlangsung sepanjang bulan Disember 2010.

Program yang dianjurkan oleh Pejabat Antarabangsa itu merupakan kesinambungan daripada program yang sama diadakan pada tahun lepas.

Seramai 192 mahasiswa prasiswazah dan pascasiswazah yang melibatkan 47 kumpulan telah terlibat dalam program ini.

Setiap kumpulan mempunyai ahli seramai antara dua hingga enam orang dan berbeza daripada program yang terdahulu, mereka mempunyai tugas yang perlu dilaksanakan di setiap destinasi yang dirancang oleh mereka sendiri.

Program ini dilihat sebagai salah satu aktiviti utama bagi memberikan pendedahan terus di peringkat antarabangsa kepada mahasiswa UMP.

Proses penyediaan kertas kerja bagi program ini berlangsung selama lebih kurang dua bulan melibatkan tiga fasa dan diselia sepenuhnya oleh Pejabat Antarabangsa UMP.

Daripada lebih 70 kertas cadangan yang diterima, 47 program telah disenarai pendek untuk dilaksanakan.

Proses pemilihan yang dijalankan memastikan bahawa mereka yang dipilih adalah berwibawa dan mampu membawa dan menjaga nama baik dan imej universiti di peringkat global.

Projek-projek tersebut melibatkan beberapa buah negara termasuk Australia, Jepun, China, India, Korea Selatan, Cambodia, Vietnam, Thailand, Mesir dan Tibet.

Destinasi-destinasi yang dicadangkan bagi program ini adalah amat strategik dan kejayaan program ini boleh menaikkan lagi imej serta menambahkan lagi 'visibility' UMP di persada antarabangsa.

Kumpulan pertama mahasiswa UMP yang mengikuti program ini telah berlepas ke negara China dan Tibet pada 18 November 2010 sementara kumpulan terakhir ialah ke negara Mesir.

Tinjauan pendapat awal daripada mahasiswa yang menyertai program ini memperlihatkan perubahan positif dari aspek sikap dan kemahiran berkomunikasi.

Kesemua mahasiswa yang melalui program ini menyatakan bahawa ianya suatu pengalaman yang amat membuka mata bagi mereka dan program sebegini patut diteruskan agar lebih ramai mahasiswa UMP mendapat pendedahan di peringkat global.

